



Andreas Caminada (san.), in dals meglers cuschiniers da la Svizra, cun Ralph Lindemann, l'editur dal magazin per gourmets.



Ospitants dal megljer restaurant en la categoria trend en Tamara e Dario Cadonau dal Vivanda, Brail.

FOTOS G. N. STGIER/MAI

# Bleras bunas novas adressas

Il nov magazin per gourmets «Graubünden geht aus 2011» è cumparì

DA GION NUTEGN STGIER / ANR

■ **Persunas cun buccas finas han valità 125 restaurants en noss chantun. Da quels en 44 vegnids vitiers da nov en l'edizun dal magazin 2011. Restaurants cun ina cuschina excellenta han ils experts cunzunt er chattà en las regiuns rumantschas dal Grischun.** Ina societad illustra è s'entupada a Puntraschigna en il hotel da luxus «Kronenhof» per la vernissascha dal nov magazin per mangiabains «Graubünden geht aus». Ina bibla per gourmets, nua ch'ìls experts crititgeschan betg ils cuschiniers e lur tratgas, dentant recumondan els plitost las bunas adressas. Ils mangiabains ed experts dal magazin che guardan als cuschiniers sur las spadlas vegnan anonim ed il pli sin fundament da cusseglis ch'els han retschet da giasts. «L'onn passà avain nus scuvert gist 44 restaurants novs», ha ditg *Ralph Lindemann*, l'editur da «Graubünden geht aus». Quai conferma che la gastronomia grischuna saja sin in nivel fitg aut. Adina puspè fettschian indigens, giasts ed amitgs dals cuschiniers attent a las bunas adressas, uschia che divers vegnan sin la glista da spetga dal magazin. *Ralph Lindemann* ha er ditg che blers cuschiniers e gastronoms sajan eventualmain dischillusiunads da na esser pli tranter quels che figureschan en l'edizun 2011 da «Graubünden geht aus». I saja mintga onn ina gronda sfida per ils experts da valitar las tratgas finas ed a la fin finala da decider tge restaurants che meritan da cumparair en il magazin. I saja dentant er ina sfida da chattar sponsurs che sustegnan en plis modas l'edizun.

## «Casa Fausta Capaul» e «Casa da Luzi»

Ils mangiabains han naturalmain visità dapli che 125 restaurants da Münstair fin Mustér. A la fin han els tshernì quellas bunas adressas che meritan da cumparair en il magazin. Senza sutvalitar ils auters restaurants che figureschan en l'edizun 2011 da «Graubünden geht aus» avain nus plitost guardà sin ils restaurants en las regiuns rumantschas e cunzunt er sin

cuschiniers rumantschs che tutgan tar ils meglers en noss chantun. In da quels è per exempel *Linus Arpagaus* dal restaurant «Casa Fausta Capaul», Breil. Tenor ils experts e mangiabains è ses restaurant il megljer da tuts en la categoria restaurants en ils vitgs. En il restaurant empernaivel savessan nus star l'entir'emna, scrivan ils experts critics. Ils mangiabains chattan er be buns plets per il servis attent e gentil da l'ospitanta *Theres Arpagaus* e ses team. En la categoria restaurants da muntogna sa chatta in ulteriur restaurant sursilvan sin plaz in, sco en l'edizun dal magazin 2010. Quai è la «Casa da Luzi», Surcasti. *Beat Reinmann*, il possessur dal restaurant, saja in ospitant bainvulent e cunzunt in cuschinier che chapescha sia clamada.

## Ulteriurs buns restaurants en Surselva

En quella categoria han ils experts er scuvert cun «l'Ustria Steila», Siat, ina nova buna adressa. La «Casa Alva», Trin, è sin il quart post (da 18) en la categoria restaurants en ils vitgs. Da nov e quai gist sin plaz sis è la «Stiva Viglia», Schnaus. Sin plaz 16 e 17 e da nov en quella categoria èn ils restaurants «Cavigilli», Flem, e «Posta», Rueras. Il restaurant «Crestasee», Trin, e la «Chamonna Terri», Vrin, èn restaurants cun ina bellezza vista. Ina buna cuschina da chasa haja il restaurant «Waldheim», Laax. Per quella figurescha il restaurant da nov en il magazin.

## Andreas Caminada ed il «La Riva» a Lai

Tenor ils experts tutga il Grischun central cun paucas excepziuns betg tar in eldorado per mangiabains. Cun *Andreas Caminada* ha quella regiun almain in dals meglers cuschiniers da la Svizra. Ses restaurant «Schauenstein» a Fürstenu è er per ils experts il numer in en la categoria restaurants da gourmets. Da nov sin l'emprim post en la categoria instituziuns grischunas è il «La Riva», Lai. La cuschina excellenta da *Rudolf Eberl* gusta tranter auter er a *Roger Federer*, ch'è in dals giasts regulars dal restaurant nobel

en il li turistic da Surmeir. Ina buna adressa han ils experts er chattà a Lantsch. Il restaurant «La Tgoma» ha ina clientella fidaivla e la cuschina da *Toni Maissen* è enconuschenta er sur il cunfin surmiran.

## Il «Vivanda» e «Muottas Muragl»

In eldorado per gourmets è anc adina l'Engiadina. Quella regiun ha numerus restaurants da luxus e quai da Maloja fin Ftan. In da quels è a Brail ed è da nov il megljer en la categoria restaurants da trend. Quai è il «Vivanda» che sa chatta en il «In Lain Hotel Cadonau». Ils experts scrivan ch'els hajan gia da ditg betg mangià en in local uschè mirveglius. Els laudan er la cuschina excellenta da *Dario Cadonau*. Il «Mezdi» a San Murezzan è actualmain il «in» restaurant en il lieu turistic da renum mundial. Er quel restaurant figurescha da nov en il magazin e quai gist sin plaz dus en la categoria restaurants da trend. Da nov sin plaz in dals restaurants cun la pli bella vista sa chatta il «Muottas Muragl», Samedan. In lieu nua che la prominenza sa lascha puppragnar en tut las modas e manieras.

## Ils meglers da mintga categoria

Categoria:	Num dal restaurant:
Trend	Vivanda, Brail
Sper las pistas	Chesa Chantarella, San Murezzan
Gourmets	Schauenstein, Fürstenu
Talians	Stüva Cuolm, Arosa
Da muntogna	Casa da Luzi, Surcasti
Instituziuns Cuschina da chasa	La Riva, Lai
Asiats	Adler, Fläsch
Vins exclusivs	Nobu, Palace, Son Murezza
Dal vitg	Mann & Co, Waldhotel, Tavo
Bella vista	Casa Fausta Capaul, Breil
	Muottas Muragl, Samedan



In ospitant e cuschinier da vaglia è Beat Reinmann da la Casa da Luzi, Surcasti.



René Donatz, il frar da Jacky Donatz.



Miss Südostschweiz Gianna Meier.



Ils hoteliers dal hotel Alpina a Val, Ursula e Karl Kühne.



Lucia Monn (san.), Casa Alva, Trin, e Romana Hendry, Basilic, Cuira.



Theres Baumann (san.), Landhaus, Fläsch, e Brigitte Vitali, La Patata, Lai.



Andreas e Monika Stump dal Adler, Reichenau/La Punt.